

光緒重修安徽通志

重修安徽通志卷一百八十二

人物志

宦績五

徽州府

唐胡學婺源人父瞳以禦黃巢功授宣歙節度討擊使學成咸通進士仕撫州司戶上書忤田令孜竄福州尋授舒城令黃巢入京師說李克用等協力剿之每臨陣爲前鋒後加宣歙節度討擊使封上柱國

新安名族志

南唐查文徽休甯人幼好學稍長任氣好俠歷官樞密副使閔王延政以建州建國稱殷元宗欲討之文徽請行乃以爲江西安撫使攻建州傳其城遷撫州觀察使拜建州畱後時李宏義挾吳越兵據福州劍州刺史陳誨將舟師擊敗其兵文徽以步

騎繼至宏義陽遣卒出迎而設伏以待文徽入其城被執送錢

塘遣還爲置酒遇毒歸金陵遂病瘖卒諡曰宣

南唐書本傳

江煥歙州人仕南唐以直諫稱

一統志

高拯字叔濟歙州人保泰閒知餘干縣喪亂後居民凋敝科役

煩重拯爲貸私錢若干萬緡每鄉實二人行商取息以資公用

民賴以蘇解任後民爲立碑

江西通志新增

宋魏羽字垂天婺源人少能屬文上書李煜署宏文館校書郎

時建當塗縣爲雄遠軍以羽爲判官宋師渡江羽以城降金陵

平入朝出知興州太平興國初知棣州改京兆府受詔詣瀛州

覈軍市租得隱漏數萬計歷度支戶部二判官召拜本曹郎中

條列利病二十事詔有司詳議皆以爲便改鹽鐵判官歷任度

支使改鹽鐵使淳化四年併三部爲一司以羽判三司出知滑

州後加給事中徙潭州眞宗時以禮部侍郎卒羽涉獵史傳好
言事強力有吏幹歷劇職十年始踰四十鬚髮盡白太宗極憐
之長子玠卒其妻自陳家貧無祿以次子校書郎瑾爲奉禮郎
子浩爲太子中舍孫平仲天禧三年同進士出身

宋史陳恕傳

張諤字昌言歙州新安人南唐祕書丞通判鄂州宋師南伐與
州將許昌裔歸款授右贊善大夫選知閬州太平興國中除西
川轉運副使土人罕習舟楫諤建議置威權軍分隸管句自是
無覆舟之患子秉字孟節舉進士儀狀豐麗屬辭敏速善書翰
太宗喜之擢置甲科解褐將作監丞通判宣州歷度支員外郎
知制誥判吏部銓知審官院後至禮部侍郎加樞密直學士復
知并州將行眞宗爲作五言詩賜之

宋史張秉傳

許迺字景山祁門人父規嘗羈旅宣歙閒爲舍旁生經紀喪事

負其骨並黃金寘死者家逃事南唐爲監察御史宋師圍金陵
統軍張雄以兵駐上江後主命逃召之雄卽以師赴己而後主
以蠟書止雄於溧陽逃曰此非柵兵之地乃戒雄曰慎無動待
吾入白與公入城逃去雄果以出戰敗死國亡入宋官至司封

員外郎

十國春秋本傳

王明字公明歙縣人希羽之孫也建隆中爲鄆陵令五代時官
吏貪污明矯其弊賕賂皆不受但令買薪芻積如邱山因築隄

以備水患

徽州府志

謝泌字宗源歙縣人太平興國五年進士端拱初爲殿中丞獻
所著文十篇古今類要三十卷召試中書以直史館賜緋時言
事者眾詔閣門非涉僥望乃許受之言路稍壅泌抗疏陳其不
可又言國家圖書多失次序請遵唐景龍中故事分集四庫遂

令直館分典四部以泌知集庫王禹偁請庶官候謁宰相須朝
罷於政事堂樞密使預坐接見以杜私請詔從之泌上言是疑
宰相以私也陛下以聰明寄於輔臣自非接下何以悉知外事
太宗覽奏卽追還前詔知福州代遷民懷其愛刻石以紀去思
歷位至太常少卿右諫議大夫判吏部銓卒錄其子衍爲太常
寺奉禮郎衍將作監主簿

宋史本傳

洪湛字惟清昇州上元人

新安志休甯人江甯籍

曾祖勳南唐崇文館直

學士祖壽桐城令父慶元新喻令入宋爲冤句令湛幼好學五
歲能爲詩未冠錄所著十卷爲韶年集舉進士有聲雍熙二年
廷試高等授右拾遺直史館端拱初通判壽許二州咸平二年
復直史館使荆湖條奏利病甚眾時議城綏州使往按視湛言
利有七而害有二凡五使西北議邊要眞宗有意擢任曲宴苑

中賦詩深被褒賞初與王欽若知貢舉有任懿者納賄於欽若之妻登第後事發欽若方得君遂為所誣流儋州卒有集十卷子鼎大中祥符四年進士至度支員外郎直史館鹽鐵判官

宋史本傳

孫逢吉婺源人太平興國七年知泉州以靖忠厚德見稱真德

秀舉與程大昌顏思魯林杓韓國華陳偁趙鼎並祀

一統志福建名宦

查道字湛然休甯人文徽之孫父元方仕南唐為建州觀察判

官宋師平金陵盧絳據歙州傳檄至郡元方斬其使及絳擒太

祖聞元方所為召拜殿中侍御史知泉州卒道幼沈疑罕言笑

以詞業稱侍母以孝聞端拱初舉進士高第解褐館陶尉後寇

準薦其才授著作佐郎至道中知果州招降賊黨何彥忠咸平

中知甯州舉賢良方正拜左正言直史館大中祥符時預修冊

府元龜天僖初出知號州上御龍圖閣餞之秋蝗災不候報出
官廩賑民給麥四千斛爲種所全活萬餘人卒真宗惜之詔其
子奉禮郎循之乘傳往治喪事遷大理評事賦祿終制道性淳
厚有犯不校所至務寬恕居京師家甚貧多聚親族之悍獨者
祿賜所得散施隨盡有集二十卷從兄陶字大均初在南唐以
明法登科入宋試律學除大理丞歷祕書少監判大理寺事知
審刑院賜金紫子拱之洎化進士爲都官郎中慶之太子中舍

宋史
本傳

俞獻可字昌言歙縣人端拱初登第歷歸州軍事推官權領州
事李順反川陝官吏多棄城獻可料州兵屯沿江爲柵以遏之
晉御史建言瑞物不在圖牒者母得以聞提點廣西刑獄平定
蠻寇爲立互市築塞以阨其險累官龍圖閣待制

宋史俞獻可
傳萬姓統

俞獻卿字諫臣獻可之弟舉進士補安豐縣尉有僧殺其師詣縣治言師出遊獻卿得其情縣稱神明調昭州軍事推官會宜州陳進亂象州守不任事獻卿往佐之初昭州積錢鉅萬獻卿平糴積穀數萬賴以饋軍改大理寺丞累遷三司鹽鐵判官上言天下穀帛日耗物價日高欲民力之不屈不可得也帝爲罷無名之費以鉅萬計後知杭州暴風江潮溢決隄獻卿大發卒鑿西山作隄數十里民以爲便以刑部侍郎致仕卒

宋史本傳

許遜歙州人眞宗時試汲尉二年汲人德之羣詣京師請遜爲令遷校書郎知縣事

一統志河南名宦

魏瓘字用之婺源人羽之子也以蔭補校書郎爲開封府倉曹參軍與內侍督作燈山內侍誅索瓘以聞詔杖內侍於省中後

提點廣西刑獄邕州獠戶緣逋負沒婦女爲傭者千餘人悉奏還其家就除轉運使以太常寺少卿知廣州築州城環五里儂智高入寇五十日城堅不能下論功遷工部侍郎五溪蠻叛除龍圖閣學士知荆南條三策招安爲上不報後卒用其言招安之以吏部侍郎致仕卒贈太尉子十一人綸以才擢守吉州

本傳 萬

姓統譜

胡遇績溪人舉進士儂智高陷邕州孫何余靖以謀略薦於朝

除行營參謀從狄青大敗智高擢湖南江西安撫使

江南通志

魏子浩婺源人以父羽恩授祕書省正字爲吏強敏歷知壽潤

滁安等州壽州盜殺寺童子有司執僧笞服子浩命脫械縱去

一府爭爲不可後數日得眞盜富人犯法死獄中子浩曰是應死而自斃覲不可窮治爾其吏受賕而爲之乎果如所料累官

司農卿知福廣等州又知江甯府致仕進衛尉卿卒

宋史衛瓘傳

汪穀字次元婺源人皇祐癸巳進士官泰興令沿江田爲水所

鬻民苦虛賦穀力請於按災御史因得奏蠲還廬州觀察判官

部使者欲中所怒郡守以危法穀爭之并被劾獄上刑部卒如

穀議孫愷紹聖丁丑進士知太平時有妖道以術惑眾忤者立

死愷立置之於法調岳州錄事參軍活平江死囚百餘人守怒

愷執法力爭守不能屈歷撫州全州所至稱神

湖南通志徽州府志

王汝舟字公濟婺源人皇祐進士熙甯中知舒城歲薦饑推行

荒政多所全活知南劍州捕盜官邀賞增入盜賊擬死者十三

人汝舟閱牘得其狀皆免死以治行第一聞哲宗時擢河北轉

運判官諫罷市珠之令徙夔州提點刑獄告歸先守南劍時祖

母沒上言諸父無在者乞以適孫解官終三年喪詔從之著爲

令有雲溪文集

萬姓統譜
江南通志

孫抗字叔和黟縣人少孤力學爲文操筆數千百言始同學究
出身後登進士甲科知潯州擢監察御史劾奏狄青不當沮敗
永洛城事又言日食陰盛當以後宮爲戒又諫止大獵遷都官
員外郎提點江西刑獄有言歲凶當稍貴常平粟價以利糴本
者抗言此非常平本意官至工部郎中子適邈邈适遇適從王
安石遊年十四議論著書已驚人登第後爲永州軍事推官邈
爲縣令安石亦稱其好學邈及孫略皆登進士第一

萬姓統譜

汪汲字子遷績溪人年二十登嘉祐進士第授慈溪令濬河慨
田數千頃民祠祀之擢太平州推官鞫贊善大夫陳知規獄方
暑繫者百餘汲訊得其情解釋澣浴知規復官繫者出爲佛齋
以報子弈字公偉與弟襄相繼登第友愛世篤爲東流令有書

生以妄言繫獄憲司欲置極典弈以爲狂疾奏上果貸死襄字公弼仕南陵主簿太守翟汝文遺書朝士言不喜爲宣州守而喜識汪主簿始襄少游太學有詔擇內生教諸小內侍大司成汪濟以襄名聞時梁師臣爲提領頗敬禮襄及登第師成欲薦爲館職襄不肯就師成知其有嫌遠意怒之弈子安世襄子安行皆登第安世官吉州永豐簿

南豐志 萬姓統譜 江南舊志

洪中孚字思誠湛之孫也元豐進士尉黃岡平鄰盜張韜爲成都縣主簿鵬門蠻叛蜀帥以屬中孚卽親呼酋長諭以禍福令自歸服人以爲膽大於身崇甯初轉運熙河興鼓鑄榷酤市易之利以給邊立墩堡給鎧仗與耕屯以防剽掠青塘內附孚夜半抵其地撫慰之酋皆畏服知太原府夏人提重兵來議地界飭諸將掩擊遁去以龍圖閣待制致仕

萬姓統譜 江南通志

王愈字原道婺源人紹聖登第初宰建昌立法賑濟活飢民數萬人知信州睦寇犯信擊敗之爲王黼所嫉坐竄逐高宗時呂

頤浩首薦之起知無爲軍

江南通志

胡汲字彥思婺源人父紹以進士爲剡簿分檢旱災民得貸惠汲登紹聖四年進士爲深州通判廨有蔬圃一千六百餘畦歲得錢踰二百萬汲以圃送公使者以事聞有詔嘉獎

江南通志

程邁字進道黟縣人元符庚辰進士高宗時歷知福州溫州上

稱其政光前絕後今之吏師又知平江鎮江都陽歲饑多盜以邁知饒州奏蠲舟車征算增米價以招商買米大至手條寬恤三十餘事民以蘇息進顯謨閣直學士因使過其鄉民有訟田者二十年不決邁閱其牘問訟者年幾何曰六十六曰爾齎券

乃某年時方七歲安得云以妻財置田訟者乃服

萬姓統譜江南通志

汪叔詹字致道黟縣人少敏於文崇甯進士累官太常博士以直言忤王黼斥歸久之權知蕪湖縣發運盧宗原議涸丹陽湖爲田叔詹爭之不得置印廳事走京師上書言湖不可涸狀帝悟從之擢提舉潼川常平時東川鹽井鹵竭民多虧課被囚奏蠲其逋且削煮鹽之籍尋知鄂州轉河南憲使有惠愛後以司農少卿總領湖廣六路財賦八年無闕事

萬姓統譜江南通志

汪希旦字周佐歙縣人大觀進士知泗州時劇賊宋江橫行及濠濠泗密邇希旦嚴守備賊不敢犯上嘉之轉朝奉郎直祕閣會旱蝗開倉賑濟蝗不入境麥生兩穗治最賜三品服歷知袁

江舒三州以朝請大夫致仕

萬姓統譜江南通志

黃葆光字元暉黟縣人以從使高麗得官試吏部銓第一賜進士出身由齊州司理參軍歷監察御史左司諫言三省吏猥多

如遷補升轉奉入賞勞之類非元豐舊制者其大弊有十請一切革去徽宗卽命釐正士論翕然蔡京怒其異己密白帝徙爲符寶郎帝思其忠明年復爲侍御史遼人李良嗣來歸上平遼書葆光論其五不可政和末歲旱葆光上疏言陛下德足動天恩足感人而太師蔡京侈泰過制太宰鄭居中少宰余深依違畏避此天氣下而地不應如此疏入不報京中以他事安置昭州京致仕起爲職方員外郎改知處州處州當方臘殘破之後盡心牧養民列上其狀加直祕閣再任卒州人祀之

宋史本傳

胡舜陟字汝明績溪人大觀己丑進士再爲監察御史欽宗卽位奏誅趙良嗣高宗立出知廬州修城治戰具冀州雪騎卒孫琪聚兵爲盜號一海蜚至廬邀資糧舜陟出兵擊其抄掠者琪宵遁伏兵邀擊得其輜重招降舒州賊濟南僧劉文舜卽使文

舜破盜丁進李勝於斬壽聞又伏兵擊敗盜張遇於梁縣擢徽猷閣待制充淮西制置使淮南八郡羣盜攻蹂無全城舜陟守廬二年安堵如故知建康府充沿江都制置使改知臨安府充京畿數路宣撫使後知靜江府罷官復起爲廣西經略爲秦檜所惡因呂源誣其受金盜馬遣勘官偏之至死舜陟有惠愛邦人爲之哭妻江氏訴於朝事得白

宋史本傳

孫義叟徽州人政和初由徽猷閣直學士帥瀘州築城有功徽

宗賜書獎諭之

四川通志新增

胡汝明字傳道黟縣人政和辛卯進士建炎中歷官殿中侍御史建言經營太學作新人才以備中興官使又乞罷州郡添差酒稅多見採納出知饒州致仕

江南舊志

金安節字彥亨休甯人宣和甲辰進士歷遷侍御史秦檜兄梓

知台州安節劾其附麗梁師成梓遂罷檜銜之丁母憂遂不出
檜死起知嚴州歷遷侍講給事中金亮死陳進取招納備守三
策而以備守爲進取招納之本龍大淵覲並除知閤門事安
節屢爭之上怒卽自劾乞竄上意解命遂寢李珂擢編修官安
節又論罷之上諭之曰朕知卿孤立無黨張浚聞之曰金給事
真鐵石人也後權吏部尚書兼侍讀力請謝事以敷文閣學士
致仕卒累贈開府儀同三司少保

宋史本傳

汪若海字東叟歙縣人少遊太學靖康初下詔求知兵者若海
應詔擢高等金人犯京師若海請河北國家重地當用之以攬
天下之權不可怯懦自守坐受其敝康王起兵相州乃上書請
立王爲大元帥鎮撫河北欽宗用爲參謀遣如康王所宰相何
鼎執異議不果高宗卽位遷江南經制使上言天下者常山蛇

勢也秦蜀爲首東南爲尾中原爲脊今以東南爲首安能起天下之脊哉遂以張浚宣撫川陝會以論軍食忤執政謫英州道出臨川時節制江夏軍馬李允文跋扈不用朝命若海馳諭之允文感悟惟其下曹成有他志將殺若海若海夜宿王林軍帳以計得林軍印奪成眾五千人成遂遷湖湘旣安以前功通判順昌府爲劉錡請援師於朝大破金人累遷直祕閣知江州丁父憂時方經略中原議起若海而若海已卒

宋史本傳

汪臯會字元贊黟縣人紹興壬子進士爲建昌軍教官創建學宮畱意教養遷醴陵宰邑遭寇旱民逃土荒撫以惠愛治以最稱人稱醴陵先生

湖南通志

汪勃

舊作滂按史改

字彥及黟縣人紹興壬子進士調嚴州建德簿長

於吏治入歷諫議大夫遷御史中丞十七年除簽書樞密院事

十八年兼權參知政事封新安郡侯八月罷復起知湖州爲政

安靜不尙鞭扑民間鑄木曰賢哲太守

宋史高宗紀
江南通志

汪若容字正夫歙縣人紹興乙卯進士官永興簿茶商確磨妨
民田爲治其魁大均水利後知洪州召赴行省陞對千言切中
時病弟若思字行夫紹興壬戌進士歷實錄院檢討官奏對帝
以爲深得愛君之義遷祕書丞

徽州府志

程叔達字元誠黟縣人紹興壬戌進士爲湖州教授金亮背盟
袖書見時宰言五事歷遷監察御史賑兩浙饑以勞被獎除右
正言淳熙初奏敬天愛民有志事功三事以顯謨閣待制致仕
慶元中特除華文閣直學士卒謚壯節

江南通志

韓邦光歙州人紹興閒官安福令軫民疾苦興利剔弊王瀘溪

暨太守王洋皆稱其廉

江西通志
新增

朱安國字康侯休甯人紹興辛未進士累官至監察御史嘗條奏出六年未決之囚出知廣州劇盜陳青寇海道遷委牙校李寶授之方略遂縛青以歸威震一方子拂宰姚江築捍海隄五

千丈

江南通志

李知己字智仲婺源人紹興甲戌進士通判婺州有滯獄數百一經予奪無復興訶州給秋衣軍士以絹輕持杖誼譁知己呼其首勅以軍法仍計絹直以給軍情悅服歷遷大宗正丞兼權

都官郎

江南通志

汪杞字南美歙縣人建炎二年進士紹興閒崇安丞縣庫陷失緡錢踰數千聲色不少動但責庫吏限一月踰時郡守魏在欲逮置獄杞曰積弊至此願聽其所爲不效則置獄未晚既限滿果盡得之有兄弟五人爭產累任不能決杞列之廷下舉唐賢

韓忠彥飲乳事訓之皆感泣均其產去課民藝桑柘十六萬株

後皆食其利監司論薦遷知安仁縣

福建通志
新增

汪安行字伯壽績溪人紹興甲戌進士權知澧州請罷公使庫

孝宗顧宰相王涯曰此朴直做家老子政事如何涯對曰舊攝

澧州民有去思卽命復守澧官至朝奉大夫

江南通志

祝華字繼張婺源人紹興甲戌進士知衡陽縣當路舉其政績

曰有實政無貪風後歷守象州梧州改知南劍州未任卒

徽州府志

方有開字公明歙縣人隆興癸未進士爲國子錄歲饑入對論

切時弊孝宗嘉之遷司農丞獻屯田大計知和州除轉運判官

兼廬帥措置營屯人服其能有奏議五卷屯田詳議三卷

徽州府志

吳天驥字伯駿休甯人隆興癸未進士調建昌司戶能折疑獄

知信州歲大饑首修荒政發廩賑糴日至萬六千人獨減宿逋

遷戶部員外郎卒

江南通志

朱晞顏字子淵休甯人隆興甲申進士授富陽尉捕方湖北沌河盜平之知永平縣苗獠悅服民爲立祠除知靖州奏言襄漢通吳蜀宜移武昌大軍戍襄陽留水軍以控鄂沔改知吉州奏言蜀之邊患不在南而在北宜移成都制置使於興元與荆鄂相應擢廣西運判講究鹽筴上便宜數千言革客鈔科抑之患後又爲廣西安撫浚靈渠通馬市南地卑瀰城苦不能久乃創新意爲城屋數千間覆之官終工部侍郎兼知臨安府

江南通志

夏尙忠字信卿休甯人乾道丙戌進士知泰州海賊時發民罹

其害尙忠率兵平之海道肅清後徙著作郎致仕

徽州府志

汪彥端字允之黟縣人乾道己丑廷對第三人歷知秀州有勢

戶占田數千畝不輸賦彥端責其輸而以田歸之民

浙江通志

汪泳字伯游休甯人乾道己丑進士淳熙中知蒲圻縣政聲藉甚上言王者仁政必自均力役始上嘉納之遷大理丞臨安有獄不決者輒繳送棘廷泳言如此則天獄反爲京府一院乞下臨安無得繳送從之後歷知泰州湖州以中奉大夫致仕

一統志湖州

北名宦

汪必達字兼善黟縣人與弟必進同登淳熙乙未進士必達知旌德縣有父訟其子者必達謂父子至恩忍以私庭言語聞官乎授父以杖令自笞之發廩賑饑全活甚眾必進宰建平有聲著有邑政論

江南舊志

吳發字伯韜歙縣人淳熙乙未進士爲臨川法曹掾多所平反遷龍泉丞往慶元慮囚狴犴充斥發或罪或釋應時決遣歡聲

載道

江南通志

吳箕字嗣之休甯人爲當塗令剖析民訟編類成書名聽辭類

稿

南畿志 舊志太平府名宦 新移

程卓字從元休甯人淳熙甲辰冠南宮別院廷對首乙科授揚州司戶參軍歷知崇仁龍泉屢有異政入爲大理寺丞遷刑部員外郎嘉定中充賀金國正旦使歸奏敵人陵弱請固邦本修戎備以待復仇除軍器監權太府少卿出知泉州請減上供銀數又請敕廣南通行會子以流通境內楮幣民旅利之爲立祠除福州帥嚴察吏蠹稅清訟息邇同知樞密院事一時政要多所規切卒謚正惠初休甯賦以卓請得蠲減鄉人祀之

宋史甯宗紀

江南舊志

汪文振字子泉休甯人淳熙甲辰進士爲長林令鋤治豪猾知台州公帑纖芥不入私門歷司農少卿提點浙江刑獄旱蝗民

饑縣督通監銅文振錄囚至華亭釋四百餘人他縣亦如之民

賴以全活者眾

江南通志

黃何字景蕭休甯人知興國大冶縣湖中三山產鐵盜鑄者數千人有密聞之朝者調軍且至何止軍境上單騎往諭皆感泣
遞散悉焚其具一境晏如延朱子弟子萬人傑爲學者師俾知

趙鸞歷知處州岳陽終朝議大夫

一統志
北名宦

汪義和字謙之黟縣人淳熙辛丑進士知新建縣歲旱白帥府
曰旱甚已批放八分矣帥初怒其專後竟從之守武岡崇學校
增科舉以變武健之習入爲太常博士兼禮部郎中樞密院檢
詳館伴正旦使時慈福几筵未撤金使以樂請義和以理折之
使慚而止官至侍御史兼侍講卒

江南通志

吳格字子平休甯人淳熙丁未進士判光州提舉浙西常平茶

鹽歲旱蝗令民雜藝不種之田以自食官不收苗主不收租逋

帥紹興請免定科浮財物力等錢官終起居舍人

江南通志

朱權字聖與休甯人淳熙丁未進士歷知惠州郡蝗禱於神忽

大雨水漲有鷹隼鳥雀驅蝗赴水死廣東有寇劫掠遣將授以

方略生擒其魁特加一秩以老乞休

江南通志

汪綱字仲舉黟縣人義和之子也以蔭入官調桂陽軍平陽令

桂陽歲貢銀二萬九千餘兩而平陽當其三之二歲久銀鑛已

竭力請蠲減歲餽傍邑惡少入境爲患親往諭之杖其首惡八

人發粟賑糶民賴以安遷知高郵軍陳揚楚二州備邊屯守之

要修築范仲淹所築興化海堰置石礎甬管以疏運河水勢提

舉淮東常平獻兩淮便宜軍國大計淮東煮鹽之利半天下歲

久滋弊帑藏空虛綱挾摘隱伏得贏金三十萬緡爲椿辦庫以

備闕乏進直煥文閣知紹興府開浚蕭山古運河八千餘丈復
創開江口以通舟車發巨室埤園以資灌溉之利儲錢三萬專
備修築自是海田始固理宗卽位召爲右文殿修撰加寶謨閣
待制奏免越經總制虛額錢九萬五千緡權戶部侍郎致仕卒

贈宣奉大夫

宋史本傳

張震字彥亨婺源人知蕪湖縣秋稅米六萬石故加耗十之六
問之邑吏皆曰官吏月俸綱運折閱仰給此耳震愴然卽減其
半知湖州踰年公私兼足乃捐府帑十七萬緡代民輸丁錢一
年罷四安鎮商稅置酒坊以補課額終朝奉大夫

徽州志

程渭老字少呂黟縣人爲斬春簿奉檄鞠龍舒管承議之獄管
行賂於道正色叱之竟論如法轉建德令歲荒躬履田畝申明

蠲放民得實惠

徽州志

朱況字伯荀休甯人慶元丙辰進士為德安府錄參歲饑漕使吳柔勝屬意荒政悉以委況況擇僧廬分設糜粥全活甚眾金人擾邊大使趙方檄況備禦有功改知甌甯時財計窘乏況措置有方足國利民為八縣最

福建通志徽州府志

趙善璩字德純歙縣人以宗室登嘉定戊辰第又中明法科除大理評事通判廣德軍歲饑借倉司米斛錢數千緡為糴本民賴之改知江州米價騰踊轉於諸路糴米三萬餘斛分給諸邑米價大減帝嘉其績召為尚書郎官至中奉大夫

江南通志

金文剛字子潛休甯人知奉新縣金人擾淮流民入境為亂文剛籍其姓名為經畫其衣食從容遣歸擢判興德監左藏及封樁庫奏核籍革宿蠹文剛故師真德秀言動一以德秀為準倣范仲淹法置祭田立義莊俾子孫世守之

徽州府志

呂午字伯可歙縣人嘉定辛未進士歷任兼沿海制置司事時海寇未平午廉知調軍出海之弊議糧盡再給不許擅還賊舟所有悉以給軍海道遂清擢監察御史與史嵩之忤遷宗正少卿出知泉州需次凡七年理宗特再除監察御史兼崇政殿說書嵩之陰擠之遂力求去帝慰畱甚切乃復入臺愈敢言無所忌以憂歸卒贈華文閣學士通奉大夫

宋史本傳

吳輔字友仁休甯人嘉定庚辰進士授崇安簿汀邵寇作督餉賑饑真德秀極器之主管兩浙運司幕職號霹靂手後除御史兼崇政殿說書首列四疏奏之帝輒嘉納

江南通志

汪勳字鼎叔黟縣人嘉定登第調淳安尉邑遭水患亟命舟救溺全者無算授廣西檢法兼提幹北銀綱羨餘悉歸公帑改辰溪時帥以辰溪遠雜諸獠欲移之勳謂臣子之職不當趨易避

難單車至邑諸獠帖服卒於官

江南通志

程元鳳字申甫歙縣人紹定己丑進士歷宗學博士輪對稱旨
出知饒州進江淮荆浙福建廣南都大提典阡治芝生治所眾
以爲治行之致元鳳曰五穀熟則民蒙惠此不足道也召爲右
曹郎官疏言八事拜監察御史兼崇政殿說書臺官潘覲吳燧
以論鄭清之被出元鳳爭之得召還寶祐元年除侍御史疏言
法孝宗八事薦知名士二十餘人累遷參知政事進拜右丞相
封新安郡公丁大全預政元鳳屢疏乞解機務乃除觀文殿大
學士與祠開慶兵興上疏收人心重賞罰團結民兵數事起判
平江府兼淮浙發運使度宗卽位進少保三年拜少傅右丞相
兼樞密使進封吉國公致仕卒贈少師謚文清

宋史本傳

方岳字巨山祁門人紹定時以甲科調南康及滁州教授除淮

東安撫司幹官高郵軍閔以制命往戮首惡數人一城帖然史
嵩之在鄂渚主和議北使王楫有割江之請岳嘗代趙葵書稿
責嵩之嵩之嗾言者論之閒居四年淳祐六年遷宗學博士差
知南康軍以忤京湖閫賈似道調知邵武軍未至峒寇作馳榜
諭之寇知岳威名迎拜車下而散改知饒州知甯國軍皆未上
而罷起知袁州新其城其後廣寇入而袁不陷岳力也官終朝

散大夫

一統志
江南通志

汪應元字尹卿歙縣人紹定壬辰進士調潭州司戶參軍奉檄
道經綏甯會獠洞嘯聚挺身往諭皆感服降散累遷大理評事
出知建平縣有死囚送郡道逸自造庭下曰公明理盡情願歸
死朝廷聞而異之累升直祕閣終兩浙東路提點刑獄公事兼
本路勸農提舉河渠公事卒於官

江南
通志

呂沆字叔朝午之子也端平丙申銓試第一知於潛縣重囚逸者聞沆至自歸通判婺州朱君章訟田四十二年吳王府爭墓田二十九年沆皆決之賈似道議行公田沆以彗星見請罷之理宗崩似道矯詔廢十七界會子行闕子沆力言非便似道怒調將作監簿尋論罷之三學伏闕訟沆屈召赴行在不復出卒

年八十一

宋史呂午傳

胡崇字宗叟黟縣人與兄嵩同登淳祐甲辰第授句容簿制置使吳潛辟入閫幕委行經界法於溧陽不履畝而民皆依限自實歷官太常寺丞上疏言公田之非忤時相出知台州台爲似道鄉郡一以公正行之天台仙居水暴漲請捐米數十萬斛以賑饑民阨於似道不得請遂乞免得祠

江南通志

程元岳字遠甫歙縣人寶祐癸丑進士累遷至殿中侍御史上

言帝王致壽之道在修德後世怵邪說以求之往轍可鑒修德之目有三曰清心曰寡慾曰崇儉皆致壽之原上嘉納之

朱史度宗

紀江南舊通志

程鳴鳳字朝陽祁門人寶祐元年射策第一歷知德慶府將之官適部內山獠猖獗或止其行鳴鳳正色曰此正臣子奮志之日也至則條上事宜於帥出奇掩擊賊黨悉平知南雄州進無逸說有讀史發微三十卷

江南通志

程崇欵縣人淳祐進士歷大理寺丞出守台州抑絕權豪甚有政聲先是府治後山妖狐變幻崇至潛伏不見

浙江通志新編

許孔明字元熙祁門人入太學值理宗幸太乙宮伏闕上書諫遊幸且言賢否混淆宰相丁大全變理失道帝嘉納之寶祐丙辰登進士仕宣教郎

江南通志

陳慶勉休甯人淳祐中知蒲圻縣湖北漕使蕭逢辰舉之曰性

資純恪學問老成一

統志湖
北名宦

江潤身字從德婺源人咸淳初官合肥主簿清廉剛決讞獄尤

矜恕多所平反

南嶽志
州府名宦

舊志廬
新移

元邱龍友歙縣人宋亡之二年李世達等兵起萬戶李木魯敬

下令屠休歙等邑龍友時得郡印率父老詣軍門以獻言亂者

非百姓意乞全活之以廣弔伐之仁萬戶許之遂承制以龍友

知徽州婺源汪元龍佐之歙鄭安知歙休甯陳宜孫知休甯休

甯趙象元程隆佐之元龍弟元圭知婺源祁門方貢孫知祁門

程克柔佐之於是止戮倡亂數人一方賴以完全金伯明爲作

九賢詠以美之

新安文
獻志

洪椿字子壽歙縣人至元中爲仙居簿邑民李念二爲亂省遣

萬戶提重兵至脅官吏手狀誣闔邑爲賊將屠之椿曰盜止一

鄉餘民何罪以死爭得免歷官至承務郎

江南通志

程願學字希聖休甯人以薦入書局修職方氏書除長樂令民

有死非命者其妻訴不願理呵曰此卽殺人賊也一訊卽服羅

江五峽諸獠時出殺掠入長樂境願學邀之於道縛其渠魁七

人集吏民分守要隘獠不敢入

一統志廣東名宦

吳安朝字元鎮歙縣人登宋咸淳進士歸元授池州路總管府

判官知賀州門無私謁州政肅然時桑哥柄政安朝曰志不我

遂矣棄官歸

江南通志

重修安徽通志卷一百八十三

人物志

宦績六

徽州府

明葉保翁字宗茂休甯人至正壬辰蘄黃盜起與汪同起兵禦寇鄧愈克徽州授以婺源州守修城積糧招撫流離升饒州知府爲守將所誣謫居濡須子仁上書請代父罪帝嘉其孝釋之

江南通志

朱模字子範休甯人洪武初判六安州在任清正左氏軍丁倡

亂單騎捕之深入賊壘遇害

江南舊志

鮑頌字尚綱歙縣人洪武初以薦入尚賓館纂修元史歷翰林院修撰同知制誥出爲耀州同知撫流亡興廢壞張氏餘黨許

王為害頗擒之又嘗覈田減虛糧五千石徽州府志

方光昭字順存婺源人洪武壬戌舉聰明正直授甯都縣大使

梅花洞寇發出奇捕平之徽州府志

查允中休甯人洪武間知零都縣時流賊犯境征南將軍帥師

討之應給軍需民不告擾及賊平撫綏黎庶奏蠲糧額至今民

思慕之江西通志新增

王正字季立婺源人洪武時以貢授給事中出知東阿縣持身

廉潔涖政公平秩滿當遷百姓詣闕畱之改郕城二邑感之如

父母山東通志

唐子儀歙縣人以文學徵知興國縣教民務農造士日有程課

劇賊為亂往捕之忽暴風雨來子儀曰此賊徵也陣而待賊至

悉就擒秩滿入朝永樂簡為趙王府紀善時王方坐嫌疑賴子

儀左右之得免

一統志江西名宦徽州府志

程繩祖字叔武休甯人洪武時舉經明行修除御史左遷湖口

令邑東黃麻潭田爲蛟所陷五百餘畝民輸虛稅繩祖齋沐禱

於城隍白日雷擊蛟斃奏豁田賦民祠祀之

萬姓統譜江南舊志

汪灌休甯人洪武時知雲夢縣創學勸農民久而思慕之

一統志

北名宦

程濟績溪人建文時官編修精邵子先天之學靖難兵入帝落

髮從水關出濟易服爲道人隨帝至滇未幾遍遊蜀粵吳楚而

往來嘗住武定獅山濟委曲翼衛歷四十載供給使令聽順無

忤嘗奉命述從亡傳藏之山巖名從亡隨筆正統間從帝還京

入大內乃歎曰今日方終臣職矣復還滇焚菴散徒今獅山有

建文祠與像竝祀從亡諸公

雲南通志新編

王谷器徽州人洪武閒蕭山知縣涖政明敏長於治才果決如

流事無壅滯

一統志 浙江
通志 新增

唐吉祥字彥正歙縣人建文庚辰進士知祁陽縣以一僕自隨

將親弟自家來迎問之曰而兄行李止此矣考績爲天下最改

葉及南陽皆有聲擢工部主事

楚紀 湖
南通志

金輝休甯人永樂癸未進士任臨江推官遇事敏給涖政詳明

晉御史以風節著稱

江南舊
通志

黃汝濟字巨卿祁門舉人爲攸縣教諭授諸生以春秋因材造

就文教勃興

湖南
通志

李厚字執中祁門人以貢授刑部主事時密察民俗甚嚴有老

婦與童孫戲曰孫毆祖母偵者以告遂坐孫獄厚以童穉無知

請釋不許明日帝以筭試童曰能識左右何謂無知謫厚安南

掾厚卽日行曰吾豈敢附會死獄以媚上耶後帝感悟召爲吏

部主事

江南舊志

胡壽安字克仁黟縣舉人知信陽縣事以艱去作詩告城隍云
神若有靈應識我去時還似到時貪起知新繁延父老詢邑中
利病而罷行之躬行田野勸民耕種性淡泊寢處一紙帳後圍
種蘆菹數畝以供賓客三宰大邑未嘗攜妻子考績赴京民泣

送者數千

一統志四川名宦萬姓統譜

俞士眞婺源人永樂甲申進士知芮城縣先官郎中風采大著
及蒞芮城能以古循良治撫綏小弱均賦役修學校興舉悉中
人情而規爲措置百度具飭祀名宦

山西通志

胡永興字彥隆祁門人弱冠召入文淵閣纂修高廟實錄登永
樂戊戌進士知三河縣奏減民賦擢趙王府左長史高煦謀不

軌密使通趙永興泣諫王感悔高煦既擒勸王獻護衛上表謝

言者乃息

江南通志

胡彥祥歙縣人永樂中知眉州重農事興學宮修墓頤堰以廣

水利

一統志四
川名宦

汪善字存初歙縣人永樂丙戌進士授吏科給事中彈劾不避
權貴出知夷陵州州多虎患善虔禱峽神旬日中虎自死遷永

州府同知

一統
志

陳宗源祁門人永樂閒福建建陽縣典史處事公平九年如一

日秩滿當遷邑民懇畱事聞升本縣知縣

福建通志
新增

方勉字懋德歙縣人永樂乙未進士改庶吉士正統初授行在

監察御史劾都御史李議巡五軍教場屢奏鎮遠侯顧興祖彈

工部尚書吳中所舉非人出按江浙回力言浙江急務莫切於

防倭而防海都指揮張翥年老且貪不堪備禦升湖廣僉事歷

右參議天順初致仕

一統志

王靜字永靜黟縣人以貢授御史時值營造奉命巡工南北又

往西域市馬陟雪山崑崙抵弱水徧歷七十二族升漢陽知府

有盜十二人待決靜廉得無辜論脫五人

江南通志

高溥歙縣人永樂中知萬縣愷悌愛民有古循吏風

四川通志新編

王俊德字大本歙縣人永樂乙未進士授御史按河北嘗除虎

患巡浙東有大豪訟構無辜數十人廉得其由置豪於法歷升

廣東左布政卒於官

江南通志

方直祁門人洪熙時爲永明教諭建立兩齋號舍振興文教

湖南志

通志

莊觀字居正歙縣人永樂閒舉人分教浙之義烏滿考優等升

辰溪教諭擢國子學正造士有方正統閒以大司馬王驥薦擢陝西提學僉事秩滿升副使仍董學校景泰初奉表赴京乞歸

一統志

朱原貞字季常婺源人永樂閒任廣信同知政事文學眾所推許修學宮勸士崇儒民懷其德後卒官郡人無少長皆爲流涕

明統志 江西通志 新增

楊甯字彥謚歙縣人宣德庚戌進士授刑部主事正統中從都督吳亮征麓川賊約降甯曰兵未加而降誘我也弗聽敗績諸將獲罪甯擢郎中復從王驥至騰衝破賊有功超拜刑部右侍郎參贊雲南軍務時麓川甫平甯以騰衝要害與都督沐昂築城置衛邊方遂定閩浙盜起命鎮江西賊至輒擊敗之景泰初

召拜禮部尚書

明史本傳

吳甯字永青歙縣人宣德庚戌進士授兵部主事正統中再遷
職方郎中郕王監國于謙薦擢本部右侍郎謙禦寇城外甯赴
軍中議方略比還城門弗啟寇騎充斥立雨中指揮移時乃入
寇退畿民猶日數驚甯奏告捷四方人心乃定景泰改元遂乞
歸不復出甯有識鑑嘗爲于謙擇壻得千戶朱驥謙疑之甯曰
公他日當得其力及謙遇害驥果歸其喪葬之

明史于謙傳

馮靖字寓安績溪舉人歷官御史陝西罕東等番以易茶馬而
譁靖往宣諭夷民咸服閩寇鄧茂七旣平其黨吳金七等據政
和稱號承命經理設奇擒獲械送京師升浙江按察司僉事晉
副使乞歸

萬姓統譜

程富字好禮歙縣舉人特拜御史江西民饑多盜命富往巡盡
發倉儲以賑大盤山妖賊勢甚熾檄指揮吳堅討之而躬率兵

爲之聲援既抵賊境堅猶未至賊布妖霧以迷軍富下令蓄銳以待霧盡賊至四面擊之破其巢會堅兵亦至遂盡俘其黨捷聞升大理少卿奏罷造紙鑄錢二局免官木二百四十餘萬調右僉都御史令往甘肅參贊軍務敷陳五事邊郵賴之官至右

副都御史

江南通志

施泰亨字守正休甯人宣德時判泰安州多善政既去任民詣闕請畱命爲本州知州以艱去服除民復詣闕請復任遂再知泰安州景泰初致仕

山東通志

汪敬字益謙婺源人宣德癸丑進士詔往湖廣纂修宣廟實錄事竣乞養歸起授戶部主事以廉能著景泰閒徽州知府孫遇以該徵稅糧本色繁重疏乞折納輕齎事下戶部敬力爲贊成

一郡德之

萬姓統譜江南舊志

汪瀚字以淵祁門舉人授福州府通判時有海寇統督民兵捕

獲甚眾歷處州府同知

徽州府志

程復初字明善婺源人以貢授嘉興府檢校倭寇至海鹽奉檄備禦邑賴以安藩臬嘉其能委之督運挽輸如期而民不擾

徽州府志

府志

江浩字敬夫歙縣舉人知廣昌縣鄧茂七侵掠縣境浩禦之賊不能犯以功升本府通判歷兩浙都轉鹽運使廣昌祠祀之

萬姓統譜

統譜

程公遠休甯人正統閒官福清典史捐俸造古屯橋民不病涉羣不逞乘沙尤亂白晝搶掠多方捕緝桴鼓無警

福建通志

程信字彥實休甯人正統壬戌進士授吏科給事中也先犯京師督軍守西城都督孫鏗戰失利欲入城信不納從城上發礮

助之寇遂卻景泰改元以天變上中興固本十事首請帝敦孝友之實以答天心出爲山東右參政督餉遼東巡撫寇深奏盜糧一石以上者死又置新斛視舊加大屬信鉤考信立碎之曰柰何納人於死深不說天順元年錄景泰閒進言者擢太僕卿改左僉都御史巡撫遼東以事爲門達寇深所中謫南太僕少卿尋召爲刑部右侍郎以艱歸起兵部四川戎縣山都掌蠻作亂進尚書節制諸師進討平之分其地設官控制兼大理寺卿致仕卒贈太子少保諡襄毅

明史本傳

許仕達字廷佐歙縣人正統乙丑進士授御史景泰元年上疏言災沴數見請帝痛自修省復請於經筵之餘日延儒臣講論經史帝褒答之出按福建劾中官廖秀貪暴秀訐仕達下鎮守侍御薛希連廉問會仕達亦劾希連貪縱乃命曹凱王豪往勘

還奏互有虛實而耆老爭詣闕請畱仕達乃命畱任期滿當代

耆民又詣闕請畱不許歷山東左右布政使卒於官

明史曹凱傳

程昊字希大婺源人正統戊辰進士授御史巡按浙江數奏劾

不法閩賊葉宗

府志作仁

八攻掠浙地以計擒斬之卒於官命有司

致祭歸其柩

萬姓統譜

朱永甯字孟康歙縣人正統戊辰進士擢御史出按河閒時聞

北警官吏多遁去永甯糾眾登陴守禦七晝夜髮爲之白擢命

方下而卒民爲罷市立祠

徽州府志

汪回顯字汝光祁門人正統戊辰進士授戶部主事景泰初奉

使見河南民饑奏發粟十餘萬石賑之民立生祠以祀使蜀覈

鹽井減其久湮增其新開奏除冗課十餘萬歷知廣惠二府

江南通志

汪榮欵縣人正統閒知建甯縣時當沙寇殘燬民流離或有從賊者多方撫諭悉令復業同郡黃瑞爲泰甯主簿嘗據險立砦以禦沙寇闔境晏然

福建通志

莊欵字尚源欵縣人景泰辛未進士授御史按浙江山東廣東福建奏免徵輸禁竊礦平賊寇止採珠按察雲南因其土俗以折獄訟政化大行官至河南右布政

江南通志

洪寬字有約欵縣舉人知桂陽州時洞獠剽掠民廬煨燼寬請遷州治於古府舊基民賴以安改知鄭州時創藩封濬漕河立會府工役浩繁寬極言州狹民貧得免其半歲饑奏免稅三分請發陳麥萬石與官粟兼濟上臺善之下其事旁郡全活甚眾

湖南通志
江南通志

程泰字用元祁門人景泰甲戌進士授戶部主事犒師陝西卻

總帥魏歷郎中遼東用兵遣泰治軍實尋遣視山東災比還條陳四事多見施行擢廣西參政往定安南地界歷任河南左布

政

萬姓統譜

唐嵩字處謙績溪人任慈利訓導署縣事庶政具舉茅岡等峒土兵剽掠嵩擒治之新令至尋以艱去九溪軍民具實保任格於例不行

徽州府志

康永韶字用和祁門人父汝芳正統丙辰進士由兵部主事改工部治水河南免夫役三萬升辰州知府永韶以舉人擢御史成化初巡按畿輔劾尚書馬昂抑市民地爭慈懿太后山陵伏哭文華門竟得如禮彗星見復偕同官上時政八事後以劾大臣考察有私下詔獄謫知順昌福清縣以知天文召還授欽天

監正擢禮部右侍郎致仕

明史魏元傳徽州府志

朱穩字伯成婺源人文公十世孫題名碑作文公九代天順丁丑進士成

化間任福建轉運使以廉幹稱改兩浙復除福建卒於官福建通志

增新

吳真歙縣人天順丁丑進士為茶陵縣丞楊榮倡亂以計擒戮

歲饑發穀三萬石以賑全活甚眾湖廣通志

饒欽字克恭祁門人天順庚辰進士授戶部主事監收通州等

處糧儲平料量時出納軍民稱便遷徽江知府地為夷獬雜處

首興學校輕徭薄賦民俗丕變所屬路南州土官無子欲以女

襲職厚賂欽不受奏以職官易之及入覲士民攀轅泣畱江南通志

謝潤字德澤祁門人天順庚辰進士授刑部主事歷浙江僉事

處州禪寺僧千餘遇官商投宿殺而沈之池婦女削髮衣以伽

服潤行部見大蛇俯伏而泣曰得非冤耶遣吏隨往蛇入池中

佯議修寺至檄郡縣收繫僧徒耳池水骸骨邱積遂焚其寺置
僧於法婦女發遣還家有姊妹同孕姊屬收生婆以己女易妹
男訟莫決潤命取兒來先取活魚襁褓如兒狀佯怒而投之池
姊不變色妹卽號呼泣救遂以男歸妹凡所決疑獄類如此江

舊通志

汪進字希顏婺源人天順甲申進士官刑部郎中出爲湖廣僉
事分巡衡永按施州土司之不法者民獲安堵升福建副使邏
羅數千人乘大艦假稱入貢迫境進察其奸率官軍逐之去遷
貴州按察討平都勻叛苗歷陝西左布政使卒進性峭直不畏
權勢事親以孝聞撫孤姪曲盡恩意官三十餘年家無餘貲

志徽
州府志

汪杲字廷輝休甯人天順甲申進士授戶部主事董輸物料於

京師途次舟焚僚屬欲以私遺足數杲以爲欺上章自劾遷曲

靖軍民府守羅雄士官相讐殺杲單騎馳諭卽時解散

江南通志

程熙字克和歙縣人以舉人知汀州府同知紫雲臺有盜數千

往來劫掠熙單騎抵其營諭散之

福建通志

葉華字仲茂婺源人景泰初以明經入監疏奏先賢朱子有廟

無祀請照孟子事例於婺源闕里祠堂春秋致祭以元胡炳文

程復心配享俞旨允行選保昌典史陳治安十策後復建言治

安五策升知縣卒於官

江南舊通志

汪恕字秉忠祁門舉人官溫州府教授倡修學宮又買地一區

以拓學陞濬腰帶河闢九曲港建文昌祠未嘗假力於有司祀

溫州名宦

徽州府志

汪溥字源學績溪舉人知薊州州南有龍池河壅塞未能濬溥

到任河忽疏通邑有蝗災溥虔禱之俄有黑蟲齧蝗而滅秩滿
百姓詣闕保畱命再任以從民望升慶遠知府歷廣西兵備副

使卒於官

萬姓統譜

胡敬字文恭歙縣人成化丙戌進士授行人擢御史清理江西
軍伍克振風裁巡按山西值歲祲檄郡邑賑濟全活數萬人遷

浙江僉事卒於官

徽州府志

汪奎字文燦婺源人成化丙戌進士知秀水縣擢御史以星變
陳十事出爲夔州通判討平雲陽劇賊量移敘州同知擢成都
知府歲饑多盜發廩賑救民皆復業遷廣西左布政以右副都

御史巡撫貴州致仕

明史本傳

汪正字惟中歙縣人成化己丑進士知長樂縣鋤強植弱杜絕
私謁遷南戶部主事歷辰州知府當道咸薦其剛大有守卒於

官

萬姓統譜
洪南通志

汪山字仁夫歙縣人成化壬辰進士授行人擢御史出按雲南
孟密强夷曩罕弄與木邦宣慰乞法讐殺三十餘年屢撫不服
山至諭以恩威皆革心効順南安諸洞恃險流劫調兵剿之踰
月而定遷浙江僉事卒於官

江南舊志

吳郁字文盛休甯人成化壬辰進士官郎中以廉能著出爲雲
南左參議寬猛適節民夷悅服

徽州府志

洪漢字朝宗歙縣人成化壬辰進士官戶部郎中督儲湖南奏
免逋課數萬升雲南參議提督銀場裁省中貴例供羨餘仍令

礦官赴司交課著爲令

江南舊志

張清字一之婺源舉人知趙州奏定皇莊子粒額例減解馬七
百餘匹民賴之升河間同知適法司中貴鞠壽甯侯獄力持正

議中貴中傷之帝曰秀才是遂免後中貴捫撫以罪詣宣州納

鏐經河閒河閒民出迎曰爲吾民受荼苦耶相泣而別

徽州府志

汪琦字時用祁門舉人知德化縣請鈔廠羨錢雇夫役以甦民

力及檄委兼理鈔廠凡收納船料痛革舊弊廉以處己惠以愛

民至今懷之

九江府志

葛興字應楨績溪人成化時判濟甯州惠民潔己魯王大書德

政二字齋以旌之

山東通志

方早歛縣人成化閒由舉人任臨安御吏方嚴聽訟明允尤重

學校敬禮士夫創造竹林長橋二座以便往來

浙江通志
杭州府志

汪道休甯人成化中知醴陵縣泣政嚴肅吏抱案牘至震懼不

敢出聲積弊以洗境內晏然

湖南通志

唐相字希愷歙縣人成化乙未進士擢御史閣殺人釋弗問相

抗論置之法出按廣西風裁峻厲以言事忤旨謫永城丞

徽州府志

吳湜字一清歙縣人成化戊戌進士除工部主事奉使採修孝

陵殿材於蜀卻千金之餽升郎中卒於官貧無以斂僚友共贖

之

徽州府志

汪貴字良貴歙縣人成化戊戌進士知嘉善縣愛民如子汰無
名之費凡數十萬錢朔望必造學講授爲人簡默短於應對不
爲當道所喜清覈田稅省小民賠納之弊以誣去官民數千人
攀號請畱其衣作畱衣亭邑人周宙等上書訟冤詔復職

浙江通志

統

萬姓譜

吳紳歙縣舉人成化間知都昌縣宅心平恕爲政有方興利革

弊民皆向慕歷官至都轉運使

江西通志新增

王珣字克溫祁門人成化戊戌進士選庶常改戶科給事中嘗

劾番僧論宮闈權貴見憚出查兩廣軍餉藩臬有不法者劾置之法還朝疏時政六事執政忌之出爲廣西參議乞休歸

江南通志

汪舜民字從仁婺源人成化戊戌進士擢御史出按甘肅劾中官將帥失事陳邊計章數十上以奏獄情辭不當貶蒙化衛經歷擢江西僉事善讞獄剖決如流其清軍法後人遵守之改雲南屯田副使麓川遺孽思祿渡金沙江據孟密承檄撫定之以艱歸服除適淮陽大饑奉命賑濟用便宜發粟活饑民百二十萬人流冗復業者八千戶晉福建按察使盜竊福清縣庫或誣其怨家已成獄舜民廉得眞盜脫三十人於死歲旱禱雨不應躬歷獄釋枉繫輕罪檄所部有司皆清獄遂大沛歷河南左右布政改涖南京都察院道卒

明史汪奎傳

洪遠字克毅歙縣人成化戊戌進士歷知蒲田濬交河三縣皆

有聲擢御史數言事不避權貴升浙江僉事以鋤豪強撫孤癯
爲先務正德中調湖廣副使會賑饑擇官分理獨委遠以全楚
之半遷右副都御史巡撫雲南改南大理寺卿晉都御史諭諸
言事者務存大體切時弊勿以詆訐爲事轉南工部尚書卽疏
乞休會江西宸濠反調兵械備禦力疾視事以勞瘁卒遠官四
十餘年勤慎如一日當劉瑾用事馳驅遠方無所附麗疾革子
挺問以家事不答但曰爾輩以忠孝立身足矣一統志

胡富字永年績溪人成化戊戌進士歷福建僉事閩福甯獄定
遣囚二百餘人以艱去起補山東遷廣東副使四會徭亂剿擒
五百餘人瀧水徭擾民富度徭所出沒處得荒田三千餘頃招
徭人耕治之徭畏徭不敢出黎人寇僧州率兵討平之歷陝西
左右布政使入爲順天府尹進南大理卿遷戶部右侍郎坐大

理時勘事遲緩罷歸劉瑾誅起故官拜本部尚書以條上廣儲

積議格於權貴不行遂乞歸卒贈太子少保諡康惠

明史本傳

方思潤字廷膏歙縣舉人知桂陽州振興學校調臨江通判盜

不敢犯嘗奪宸濠湖田還諸民及歸濠使人伺舟次殺之由閒

道得免

江南通志

葉肅字致和祁門舉人知黃梅縣有婦婦逋賦召之使傭織以

償農人鵲牛輸稅使立券以候秋成冤獄積年不決立剖之以

艱歸民涕泣越境而送之

江南通志

胡汝慶字天錫績溪人以貢授長沙推官時賊擾長沙指揮韓

輔戰死汝慶設計與賊戰遂擒其首劉英等以功被旌

徽州府志

胡愈字宗韓績溪舉人授歸德同知時河失故道泛溢甚愈白

當道別鑿新河以殺其勢掘地得窖錢悉以佐治河費升絳州

府通判

徽州府志

謝營字廷獻祁門人成化辛丑進士由行人授御史巡視浙江

奏免竈戶負課又奏私販肩擔背負者不坐民免流離遷雲南

按察副使軍變單騎入營諭解後官陝西按察使謹邊防釋冤

獄有僧妙正者恃秦王勢殺人吏不敢問執而治罪陝民德之

肖像以祀升廣東布政卒於官

陝西通志
祁門縣志

黃華字實夫歙縣人成化辛丑進士知平江縣修繕學校壇宇

橋梁道路歷官兵部主事奉敕大閱兩京山東江浙諸地得材

官騎士數萬參議福建討平漳汀流賊以剽瑾擅權歸

湖南通志

南通志

孫怡字德容祁門人成化甲辰進士官刑部郎中理刑淮安請

託不行時人爲之語曰一官清澈骨三尺法無私

江南舊志

汪澐字源潔績溪人成化進士知玉山縣寬簡宜民清苦著節每食齋粥而已嘗公出刻期未回丞間饋以米力卻之尋擢南

臺御史

江西通志
新增

汪鏜字汝和歙縣諸生官畱都司北城獲巨盜一時懾伏江無剽劫旋判楚雄攝郡事北勝馬敕二司劫殺數年受檄以單騎往兩言而事定請於督學以縫掖衣衣其嚮學者遂著爲令而俗益化

歙縣志

張敏字志學祁門人成化辛丑進士知桐柏縣民祠祀之擢御史劾張皇親蕭內侍怙寵肆橫時稱張鐵面升四川參議致仕

江南通志

曹祥字應麟歙縣人成化甲辰進士授南戶部主事遷郎中出守寶慶府教民作水車以濟旱潦參政四川與平藍鄂劇盜歷

官右副都御史巡撫貴州阿則阿馬等煽亂會兵擒剿平之以

疾歸卒賜祭葬

湖南通志
徽州府志

胡光字文光績溪人成化甲辰進士授廣州推官以劾中官出

鎮不法事謫白泥驛丞改知灌縣築江都堰除虎患升曲靖府

同知灌人祠祀之

一統志雲
南名宦

潘珏字玉汝婺源人成化甲辰進士知蘄水縣城內有津人競

渡或致淹溺珏架梁以鐵撻之民不病涉北郭外置倉二十四

所又增修水次倉後知蘄州作阜民倉積粟至八萬餘石歲旱

發倉以賑多所全濟轉金華同知蘭谿民誣姪夜毆叔殺其妾

獄具珏閱成案見其初驗時不言妾何衣悟曰豈有婦人裸而

救鬪者一詰而服坐叔故殺而出姪罪

一統志湖北名
浙江通志

胡暄字啟明歙縣諸生成化間官湖廣靖州綏甯主簿山川險

阻苗寇出沒郡邑莫敢聲討贈攝邑令請加征剿監司趨之卽
委轉粟運輸兼統巡哨次崖小水關硤等堡生擒斬級立功凱
旋監司用其議奏請立縣名曰城步凡六次進擊皆有功績又
請以軍興餘糧賑貸貧民在邑勸農桑崇儒雅發奸摘伏鋤弊
興利民人戴之

敘縣志

汪嵩字季高婺源舉人知安吉縣歷撫州同知乞休歸舟至上
饒聞宸濠亂卽回舟慷慨勤王亂定告歸王守仁畱之不得以
禮送還鄉

徽州府志

程寬字栗夫歙縣舉人知安化縣歲旱蝗捕滅甚力煮粥以賑
全活甚眾歷知光山孝感山陰皆有聲遷建甯府通判檄主海
口鹽政有大豪相構爲亂寬畫方略討平之改漳州府同知

通志 徽州府志

黃應坤字惟簡歙縣進士知浮梁縣清廉慈惠人不見其疾言
遠色民無不達之情而吏畏其操介凜如神明宿弊爲之盡清
庭有餘閒獄無滯訟其請改置郵馳路尤爲永遠便民未暮年
以憂歸民攀留不得立祠祀之

江南通志
新增

戴騶字致道績溪舉人知建安縣除避繇詭籍撤佛寺爲養濟
院清官地爲義冢治大豪練民兵築河隄興學校致仕歸惟圖
書敝衣而已

徽州府志

江昌字伯大歙縣舉人知攸縣輕徭節費與民休息宿猶不敢
市姦升南昌同知有當戍者挾中貴請免昌立遣之擢岳州知

府

徽州府志

汪璿字舜璣黟縣人成化丁未進士知武岡州改陝州擢工部
主事清理九江鎮江蘆洲有大豪侵貧民業悉追還之餽金求

免者卻之論如法復立條例以垂永久以疾歸

江南舊志

范順休甯人成化末知麻陽縣勸農興學務以理義化民創建

官舍有廢必舉

湖南通志

方汝榮字君實績溪監生成化間任福建安溪知縣清勤愛民

尊嚴教士以事忤郡長吏中以法當道察其廉能得釋隨以憤

卒士民大恚

福建通志新增

唐弼字希說歙縣人成化丁未進士授戶部主事命監內帑中

貴斂手避之歷四川僉事不法吏聞風解綬去以疾歸行無以

爲裝

成都府志

汪度字宏夫績溪舉人知上虞縣衣布茹澹人歌誦之民有犯

必以理論未嘗輒加鞭扑民亦不忍欺舉賢良忤劉瑾歸士民

樹碑頌德正德時饒賊猖獗倡率義勇保境邑賴以安上虞與

本邑皆祀之

浙江通志
徽州府志

汪明字廷瑞黟縣人以貢授新昌縣丞有巨盜劫掠鄉邑討平之升湖口知縣一日見羣鳥哀鳴於庭隨之數里外茂林中見數十巢卵未成雛訊之則明日伐是木也召其民止之又夜夢大池側有披髮訟冤者詰朝涸池果得屍爲怨家所傷治抵罪升歸德州知州徽州府志

程傳字佐時績溪舉人知新昌縣建學宮築義冢修養濟院民

庶爲立去思碑

徽州府志

孫榜姓

忠顯字良輔歙縣人宏治癸丑進士授大理寺評事每

論囚覆奏徹夕不寐披閱再三乃上之奉命審錄江浙紹興饑民求賑所司坐以劫官糧罪忠顯訊出之全活甚眾升左寺正

徽州府志

戴敏字遜之婺源人宏治丙辰進士官辰州知府尊賊猖獗敏
緋衣小隊馳賊營呼曰太守來賊駭竄復呼曰太守來活汝非
殺汝也賊羅拜遂降擢貴州左參政丁父艱御史以方征都勻

上疏欲雷敏不可遂歸

江南舊志

吳遠字惟明歙縣人宏治丙辰進士知莆田縣歲祲多盜遠課
農桑固封守賑困乏凡學舍橋梁郵館皆治之不累民盜皆化
爲良升黎平知府黎雜徭獠喜弄兵遠以禮讓教之彬彬向化

江南通志
福建通志

胡潛字孔昭績溪人宏治間任福建德化知縣居官三年廉潔
自持凡水利橋梁廨舍悉捐俸倡修訟者常勸化之使自省輟
扑不施囚繫不及老幼以艱解任

福建通志
新增

戴銑字寶之婺源人宏治丙辰進士選庶吉士改給事中數有

建白武宗卽位請敕六科檢詳宏治間所行諸大政備錄進覽又言四方歲辦多非土產請蠲其所無旣乃與李光翰等連章奏畱劉健謝遷且劾中官高鳳帝怒逮詔獄廷杖除名銑創甚

遂卒世宗立贈光祿少卿

明史本傳

王壽字希仁婺源人宏治丙辰進士官禮部郎中時冢宰爲劉瑾之族嘗有所屬駁不行出守桂林乞養歸行李蕭然耕讀自

給

徽州府志

程材字良用歙縣人宏治丙辰進士授汀州府推官屬邑有訟悉詣材知府嫌之讒於巡按御史胡華會有囚華欲置之死材力爭華悟遂以循良薦擢御史清軍浙江道遇中官進鮮者暴橫不法疏劾之武宗立上正本十事劾內侍馬永成谷大用劉瑾竊弄威權瑾撫其細故罰米輸塞徙其家屬於海南瑾誅得

釋江南通志
徽州府志

張芝字廷毓歙縣人宏治丙辰進士授大理評事督學廣西會
猺獞反監軍討之猺匿深穴中以計盡其矢石舉種就俘擢荆

南副使命下而卒江南通志

汪亨歙縣人知桂陽縣潔己愛民邑軍驕悍歐死平民立寘之

法軍始戢卒於官葬桂陽桂枝嶺湖南通志

汪瑛歙縣人知藍山縣政尚寬平歲荒設法賑饑民免離散湖南通志

通志

程瑄字德和歙縣人宏治丙辰進士除戶部主事摘發隱沒官

緡四千椎北新闢稅清理屯田皆以廉稱遷泉州知府擢兩浙

鹽運使江南通志

吳漳字清甫歙縣人宏治己未進士知胙城縣出見沙羅中有

兒捧頭跪訴夜夢有言宋山之名者得其人一訊而服置之法

擢御史以劾劉瑾削籍瑾誅起官巡按北畿升山東副使河決

黃陵岡殫力鳩工齋沐告天水乃南徙復故道擢都御史江南通志

方謙字純吉祁門人宏治己未進士知鄞縣劉瑾女姪殺人吏

不敢捕謙叱令立致庭下論如律瑾以他事中之逮繫詔獄瑾

誅起工部主事出督蕪湖關關口水迅風利不易泊而邏者誣

其走關商苦之謙爲區別措置至今賴之江南舊志

章瑞字廷召績溪人宏治己未進士授行人擢御史劉瑾竊柄

瑞上五事甚剴切謫江南布政司都事起知思恩府八寨賊時

出剽掠都司甘霖不敢討乃欲屠十三村以邀賞瑞責之曰汝

坐視八寨不問乃貪功欲殺平民吾必劾汝霖懼而止江南通志

唐澤字沛之歙縣人宏治己未進士知平鄉縣邑多水患築隄

一百八十里遷刑部主事時治獄者多阿劉瑾意殺人澤持法獨平出補福建副使平海寇斬首七千餘級累升都御史巡撫甘肅土魯番據哈密城爲患眾數千病泄多死澤計羸寇不足殲使醫治之有閒命之曰若病今起矣諸朝以戎服見寇皆頓顙泣謝歸上表誓不復反悉還侵地升戶部右侍郎卒於涼州

贈左侍郎諡襄敏

江南通志

汪標字立之祁門人宏治己未進士知武定州捐市稅民大悅升刑部郎中出知鶴慶府政通民和調大理民遮擁不得行立祠樹碑升金甯兵備致仕子溱字蛟潭正德丁丑進士授大名府推官帝幸大名溱因事進諫陳軍民疾苦從駕官取驛馬去溱追回帝曰汪溱邊督才也劉瑾聞之曰溱一見我邊督可立得溱不答瑾誅升湖廣兵備平甯夏之亂擢江西左叅政致仕

歸江南通志
徽州府志

汪彬字學之祁門人宏治壬戌進士授工部主事督臨清輦殿
例有耗羨彬不受復督通州倉同官王浚失火焚庾法當逮彬
自署任咎坐繫得釋歷知南甯府徽州府志

潘珍字玉卿婺源人宏治壬戌進士知諸暨縣創建預備倉新
學宮拓養濟院民不知勞歷升山東僉事分巡兗州賊劉七等
猝至有備不敢攻轉掠曲阜珍奏徙縣治而城之遷福建副使
湖廣左布政使以右副都御史巡撫遼東入爲兵部左侍郎時
議請討安南珍上疏諫帝責珍撓成命褫職歸尋詔復官致仕
卒贈右都御史明史本傳
浙江通志

程文字煥章婺源人宏治乙丑進士歷大理寺正獄無冤滯擢
按察僉事備兵廣南徭獍不敢內犯與當道籌邊事不合罷歸

江南
通志

潘旦字希周珍之族子宏治乙丑進士歷知漳州邵武二府在
漳州時郡多海盜旦廉得土豪陰爲盜主者悉置之法三遷浙
江左布政使斥羨金不取擢右副都御史撫治鄖陽數平巨寇
累遷南刑部右侍郎旋以兵部左侍郎提督兩廣軍務詔起復
毛伯溫討安南適安南使至求貢上疏請畱師觀變時族父珍
適以言安南事得罪尚書嚴嵩張瓚絀旦議不用改南兵部未
行引疾乞休卒贈工部尚書

明史潘珍傳

浙江
通志

葉天爵婺源進士宏治間知崇仁縣剛明勤慎摘伏如神崇尚
鄉賢興復水利又新寶唐書院士民思之

江西通志
新增

李汎字彥夫祁門人宏治乙丑進士授工部主事歷郎中出知
思恩府猺獞變作單騎宣諭就撫者三萬餘人邊境悉甯會有

忌其功者引疾歸

江南通志

閻睿字汝思祁門人宏治中官浙江按察副使奏敕巡視海道

倭寇時入劫掠睿至水操艦戰咸斂跡不敢犯海道肅清

浙江通志

葉藹字德敷祁門舉人歷官慶遠知府田州岑猛謀逆藹征剿

多所贊畫猛授首餘黨未平單騎往諭之以功晉秩參政自撰

征苗錄記其事

江南通志

重修安徽通志卷一百八十四

人物志

宦績七

徽州府

李時字惟中休甯舉人歷嚴州府通判常例一無所入海甯患海潮累隄不就上官以屬時齋沐虔禱踰月而成升本府同知

民樹碑志感徽州府志

汪齊民字以成婺源舉人知安仁縣時有亂民稱兵當道委捕之齊民單舸往寇以兵來不爲動以酒餽進飲食之不疑遂感

動降徽州府志

謝溥字公濟祁門舉人知長汀縣裁冗費革例錢王守仁剿武

平挂阮象洞檄溥轉餉有功長汀人祀之名宦一統志福建名宦

汪璽婺源人宏治中知武昌縣歲旱虔禱以勞卒官嘉靖中建

鳳臺書院祀之

一統志湖
北名宦

方進婺源人宏治末任崇仁縣寬嚴得體吏戢民懷尤精藻鑑

正德丁卯鄉試豫製匾額三曰今科領薦必劉最劉寯與周禧

也榜發果如其言

江西通志
新增

余罄字宗器婺源舉人知廣昌縣盜賊屏息流移來歸宸濠叛

王守仁移檄討之罄振旅戰於江斬五百餘級祀廣昌名宦

徽州

府志

鄭晃字晦之祁門舉人爲曹州學正流賊入境率諸生守禦升

長沙府判益勵清節通賦者爭先輸納轉馬湖同知討平芒部

叛蠻

湖南
通志

潘鑑字希古婺源人正德戊辰進士歷福建僉事平安南盜有

功累升右副都御史巡撫四川上時務四疏皆關切要改工部
左侍郎督採木事竣奏言湖廣川貴諸府民疲於採辦請量議
蠲復從之起撫兩廣以疾卒謚襄毅鑑性坦易不爲危言激論
而耿介卓立不可干以私治官如家恭勤潔白之

一統志

程昌字時言祁門人正德戊辰進士知蘄水縣擢御史陳十事
率同官伏闕諫武宗南幸巡按福建討平南靖諸賊復巡廣東
殄滅新會新甯劇賊歷湖廣四川按察使致仕

徽州府志

曹深字文淵歙縣人正德戊辰進士率同榜百餘人撫劉瑾逆

跡疏於朝罰跪午門五日以羸成疾授南兵部主事卒

江南通志

金約字用博休甯舉人署唐縣教諭會流賊至乘城守禦矢中

項益奮激固守賊遞升國子監助教祀名宦

江南通志

江一桂字伯馨婺源舉人知建甯縣制黠胥剝稅政建書院置學田民建祠與宋令趙紡夫並祀升南戶部主事出守太平壤接交趾時莫登庸蠢動毛伯溫奉命征之計先遣使往諭一桂請行登庸乃稱臣築受降城建昭德臺於鎮南關以壯邊防進階亞中大夫及卒諸夷創桃榔祠於關內祀焉

一統志福建名宦廣西通志

汪瓚歙縣人正德三年知興甯縣十五年復任建申明旌善一

亭先是賊劫縣治瓚被劾及復任歡動一邑

湖南通志

舒泰婺源人正德中授武岡州同知民黠難治泰撫以忠誠皆悅服藩府官校需索不肯阿徇被讒求去民涕泣祈畱不得遂

致仕歸

湖南通志

張士鎬字景周歙縣人正德辛未進士授大理寺評事武宗南巡抗疏諫廷杖謫南刑部照磨後官終浙江副使

徽州府志

汪元錫字天啟婺源人正德辛未進士授給事中三遷都給事中陝西鎮守中官廖鸞族子鎧冒功爲錦衣千戶隨鸞於陝元錫疏劾徵還偏頭關之捷錄功太濫疏劾太監張忠總兵官劉暉等不宜賞帝幸昌平大同宣府及幸喜峯口皆抗疏諫帝將親征宸濠復諫阻及濠就執偕六科馳疏請回鑾帝在南京復申前請語極危切世宗卽位首劾郭勣等十人皆江彬黨宜下獄治從之帝以李福達獄下三法司於理元錫不能平有後言張璁以聞并下獄奪職後起故官歷左右侍郎致仕卒

明史本傳

唐濂字景之歙縣人正德辛未進士授太常博士擢御史章累

百上指切時病權要無所撓巡按江西先是居臺時密疏宸濠

異謀至是聞命兼程赴官中途聞母訃不果行卒於家

徽州府志

葉天球字良器婺源人正德甲戌進士授戶部主事監倉居庸

關武宗駕突至天球伏謁疏請回鑾出知東昌府行常平法積
粟數萬立團甲籍民丁出入莫敢爲奸因州縣瘠沃差三等以
均徭役歲饑設法賑濟流民并籍記安插全活二萬人歷官四
川右參政卒子份嘉靖癸未進士授刑部主事奪武定侯郭勛
所占中官園地還其人擢山東提學僉事裁抑浮競以正士習

徽州府志

鄭佐字時夫歙縣人正德甲戌進士授刑部主事數決疑獄改
禮部議立朱子後博士佐有力焉嘉靖初以議禮事極陳清甯
宮後殿災變之由出爲福建僉事備兵饒州前後誅閩饒宿寇
升江西參政徙貴州乞歸

江西通志
徽州府志

胡松字茂卿績溪人正德甲戌進士授嘉興推官擢御史首劾
錢甯等爲宸濠黨請罷監寺臨清市店又論東廠宜裁疏薦謝

遷韓文等以忤罷嘉靖初起故官以論桂萼引用江彬黨王瓊忤旨謫廉州推官歷升右副都御史上治河便漕疏晉工部尙書伊王欲拓府地賄嚴嵩期必得松據祖制爭乃止俺答入寇仇鸞以邊眾入衛欲悉其眾實京師移武庫仗於營便給調松力陳不可弗許尋移疾歸卒年八十三

明史本傳
江南通志

黃文光字應奎休甯舉人知冠縣冠俗好訟文光勤於化導訟漸簡使者行部持倉庫吏責私簿典庫曰官無一錢出入簿安

得來使驚異

江南通志

趙時勉字誠之歙縣舉人謁選上時務二十事知武城縣歲饑民流力請監司疏蠲民租之半省廚傳費歲數千緡祀名宦

江南通志

通志

方紀達字行可歙縣人正德丁丑進士知南豐襄陽二縣擢南

給事中張璉桂萼用事抗章詆之出爲廣西僉事值田甯用兵之後出謀發慮動台機宜如思恩之遷荒田隆安之不屬田州皆有力焉以艱去民至今德之

廣西通志

程資字仲朴婺源人正德丁丑進士授溫州府推官郡有黃洲埭爲永瑞二邑水利關鍵適隄圯河決資率士民成之呼爲程公埭補台州歲饑請於郡守捐租賑之歷升雲南參政歸

徽州府志

汪思字德之婺源人正德丁丑進士選庶吉士改給事中嘉靖中首薦耆舊石瑄韓文等以輔新政極論太監崔文鮑忠芮賢之罪薦尙書林俊之忠力救諫臣劉最讜論重一時未幾論劾戴功爲外戚議封思奏此必有大臣貪天功爲己力者議遂寢出爲廣東參議擢雲南副使歸

江南通志

胡宗明字汝誠績溪人正德丁丑進士授戶部主事甘肅邊警

督餉有功進四川參議移廣東劇盜充斥設奇俘馘而還

建參政漳泉諸郡旱穀價湧騰白直指使者改折民賴焉調陝

西平黎有功進雲南山東布政使升副都御史巡撫遼東增築

屯堡多倣古遺法

江南通志

江元輔字堯卿婺源人正德丁丑進士知新喻縣以從王守仁

平甯藩功升戶部主事士民攀留繪像祀名宦歷升郎中監督

徐倉卒於公署

徽州府志

潘鑑字希平婺源人正德辛巳進士授戶部主事監北新關罷

鎮守無名之需鈔額告溢則盡蠲小稅歸其羨於司農歷郎中

革部中白直三百人宿蠹一清出知長沙府搜剔奸弊案無滯

牘修郡志新學宮號稱幹濟累官河南左參政

湖南通志
徽州府志

程輅字邦載績溪人正德辛巳進士歷官給事中上六事曰慎

錫子杜奸欺核軍功累年勞限因革清詭冒武弁應革者盡革

去坐救安盤劾郭勛削籍後復官

江南通志
徽州府志

潘潢字薦叔婺源人正德辛巳進士知樂清縣爲治務漸民於
孝義以經術相劖入爲禮部郎進大學衍義勸經筵御講改吏
部前後章數十上皆切至署選事冢宰欲私二人潢不從左遷
禮部督學閩中搜市肆壞教書焚之立輔仁紀業二冊講明正
學歷遷至戶部尙書與嚴嵩忤以議條例不合上疏自劾徙南
工吏兵三部尙書告歸潢貌不踰中人而守道守官萬夫莫抗
居常恂恂如不出口至矢謨慷慨必盡所懷卒諡簡肅

一統志

唐仕字信之歙縣舉人知福安縣俗故簡陋好襪祥仕首葺學
宮銷元武銅像爲文廟禮器廢白蓮禪堂爲書院射圃創醫學

藥局行之三年風俗頓革遷景州守乞養歸

徽州府志

江軾字子敬婺源舉人判紹興築外堰捍海潮禹陵地爲豪所侵毅然復之擢知連州獍民嘯聚剽掠單騎抵巢諭下之以父

疾歸遂不出

徽州府志

方廷璽字信之歙縣舉人知山陰縣地近海埭閘蓄洩不時爲民患廷璽立石閘槌海口並山爲隄益注填闕之水以溉鹵地旱蝗禱於神蝗不爲災

徽州府志

汪瑄婺源人嘉靖初知長樂縣值洊饑多方賑卹躬控監司乞爲發倉都守汪文盛遂與瑄共疏以聞詔蠲其租民歌曰天降

殃歲卒荒不有二汪誰立我僵

福建通志

許瑄字伯和歙縣人嘉靖癸未進士福建興化知府持官廉正督學使者校士峭刻瑄數爲諸生請諸生無不蒲伏謝期年以

憂解任往弔者數千人

福建通志新增

程旦字孟明歙縣人嘉靖癸未進士授戶部主事歷升雲南按察使考驗土官楊訓陶炳獄立結其罪時議征安南陳十餘事多中機宜升浙江布政苗民號泣攀車追送

徽州府志

方升字世猷婺源人嘉靖癸未進士知永嘉縣刷弊政制豪強以禮整俗吏胥有犯不少貸張璵語其鄉人曰方令鐵漢勿犯也累官福建副使卒以直道忤上官歸

溫州府志
徽州府志

方達宜字伯時歙縣人嘉靖癸未進士歷知青田縣歲饑請發廩弛禁掘御史以忤權相左遷累升湖廣參議營繕顯陵奏省東南綱費千萬備兵鄜州與曾銑議復河套銑得罪忌者并中之以苑馬寺卿歸青田人祀之學宮

徽州府志

汪仲成字汝玉績溪人嘉靖丙戌進士授南大理評事有巨璫從子殺人賂問官求脫仲成不從竟抵法轉右寺正條陳八事

遷思恩知府時土官岑濬以叛誅其子岑金攻城仲成以計縛之改桺州乘臘夜襲誅劇賊韋扶諫建駕鶴書院以育諸生桺船稅歲千金悉委縣收貯以備軍餉又改程番府敷歷三郡清介如一日

江南通志
徽州府志

戴嘉猷字獻之績溪人嘉靖丙戌進士知烏程縣賦繁重爲上於朝乞均之置義田數百畝徵穀構學舍課諸生升給事中以言事廷杖謫桂林尉遷高州府同知署雷州府事蠲舟稅增設石閘以護新城升四川僉事獲私茶金巨萬以築馬湖城升湖廣參議久旱民苦令貪卽劾去之兩大注晉浙江巡海副使卒於官

一統志廣東名
官浙江通志

汪大受字叔可婺源人嘉靖己丑進士選庶吉士改工部主事權稅杭關開貼沙河以便商商人祀之遷郎中出爲廣西僉事

歷升福建參政平劇賊鐵古等巢有功以副都御史巡撫湖廣
歲饑親往巡問發廩賑給蠲租停徵活饑民二十七萬顯陵工
興計費百萬多方區畫精稽裁汰迄成費止四十萬倭寇東南
徵楚兵檄副使熊某往熊恃首輔嫺稱疾不行乃別遣將領兵
論熊避事忤相意遂歸

徽州府志

鮑象賢字復之歙縣人嘉靖己丑進士授御史歷官雲南副使
毛伯溫討安南檄雲南巡撫汪文盛會師以象賢領中哨象賢
言剿不如撫文盛然之卒如其言遷右副都御史巡撫陝西移
撫雲南集土漢兵七萬討沅江賊那鑑鑑仰藥死遷兵部右侍
郎總督兩廣軍務討平海賊徐銓又擣廣西賊黃父將巢大獲
入佐南京兵部被劾歸起太僕卿復以右副都御史巡撫山東
召拜兵部左侍郎年老引去卒贈工部尚書

明史毛伯溫傳

程烈字惟光歙縣人嘉靖己丑進士除工部主事榷木於杭杭
鎮守中官歲出數十金付關僧和市實鉤取之誅求數倍烈列
其狀於部自是斂跡

徽州府志

侯嘉晏徽州舉人嘉靖閒知石樓縣御民以寬不喜事敲撲民
胥安之嘗爲歌稱其儉約廉仁能福庇斯民後擢河南府通判

山西通志

新增

鄭恭字子安績溪人嘉靖己丑進士知黃巖縣擒海寇疏河道
歷升樂平知府蠻攻阿村恭部勒民兵突赴之驚遁去以艱歸
起補卽墨民多逋賦恭請一切蠲之調大理土官木氏阿氏構
兵彌年不能禁恭爲解之

徽州府志

張全婺源人嘉靖中由舉人歷知雅州多惠政民謠曰急流下
有深灘劉澤後有張全祀名宦祠

四川通志
新增

黃福字子謙休甯人嘉靖己丑進士授兵部主事升武選司郎中司禮監爲從子乞錦衣百戶旨下福執奏不予凡錦衣有罪責緣漸復者福盡裁之遷福建參議以部事詿誤謫判饒州尋遷浙江僉事開城河疏湘湖升湖廣參議卒

徽州府志

方舟婺源人嘉靖己丑進士知富陽縣以文學飾吏治修學宮及縣志建觀山鐘樓人文興起

浙江通志

黃鎰字德鳴歙縣舉人知蘭溪縣擢御史奉敕行邊時武定侯郭勛驕橫撫臣張漢師失律鎰將糾之爲二人先事中傷謫浙江按察司知事浙有泌湖爲豪所占鎰復之官被利者數邑遷濱州知州歲饑民流請蠲逋減額躬行阡陌相勞苦民感動復業濱人祀之升南刑部郎中卒

徽州府志

舒遷字于喬黟縣人嘉靖乙未進士授行人都御史歐陽鐸欲

增山稅遷力止之擢御史著居官慎己二銘按山西清理鹽課

羨餘悉奏賑邊又按廣東剪豪暴黜貪汙所至有聲

江南通志

胡文彬字仲質績溪選貢授嚴州通判清苦自勵淳安礦賊爲

亂以至誠諭之皆感泣歸農權稅北關總攝鹽政皆以廉節自

持

浙江通志
徽州府志

陳有容字仁甫休甯舉人知歸德州有羨金二千舍人以爲言

正色卻之終瑞州同知

徽州府志

汪佐字汝賢歙縣舉人授南昌推官廉介不苟遷九江同知會

南昌水民叩部使請畱乃捐俸爲倡以賑民忘其災

徽州府志

程達字時望婺源人同知衢州府恬靜寡欲禮士愛民視篆龍

游儲積獨贏拯開化之弱全活者眾

浙江通志
新增

程鐸字子木歙縣舉人授廣州同知承檄鉤校韶州計簿韶藏

有無名錢萬餘緡或以陷鐸不聽爲疏其始末立法以杜侵牟

徽州府志

汪鯨字時躍績溪舉人授保甯通判歲饑立法賑濟革猾吏均

徭役抑豪宦善政多可述

徽州府志

汪楠字良用婺源舉人知霑化縣歲旱蝗出令捕蝗一升者易

以斗米七日而蝗息

徽州府志

金用字九夫休甯舉人知翁源縣有治鑄者據山爲民患單車

諭之遂散去郡命巡視海舶夷人皆感其惠扁其名與故盛令

同揭舶上升儋州同知卒於官

徽州府志

胡璣字仲珪績溪人官新化州同知寇者索擁眾萬餘又有者

樂旬殺官奪印撫按委璣招安裁制得宜計縛其魁民夷稱便

徽州府志

胡宗憲字汝貞績溪人嘉靖戊戌進士擢御史出按浙江時歙人汪直據五島煽諸倭入寇而徐海陳東麻葉巢柘林乍浦川沙窪日擾郡邑倭寇嘉興宗憲中以毒酒殺數百人超擢右僉都御史進兵部右侍郎宗憲與汪直同鄉里欲誘降之釋其母妻於獄遣客諭直直心動會徐海與陳東麻葉三路進兵攻乍浦圍桐鄉以計閒之諭海縛陳東麻葉而別遣陳東書令圍海故泄之海怒遂縛東來獻乘其黨擣圍之海投水死因次第俘諸賊及海首以獻兩浙倭漸平加右都御史復以計誘汪直至下之獄論死以功加太子太保後有劾其黨嚴嵩者逮至京帝念其功曰宗憲非嵩黨今若加罪後誰爲我任事者因得釋繼又被劾下獄竟死萬歷初復官謚襄愍

明史本傳

鮑道明字行之歙縣人嘉靖戊戌進士歷官浙江按察使浙輻

湊之衝道明戒閹者毋入鄉人謁母入關說者書卽權豪面謁
欲有言曾不得啟齒積弊一清仕至南戶部尚書

浙江通志

洪垣字峻之婺源人嘉靖壬辰進士知永康縣廉慎有才清稅
糧興水利嚴溺女及火葬之禁擢御史按視兩淮鹽政請蠲餘
鹽積逋銀百二十萬清核泰州民田與竈戶相錯使無侵冒在
臺七年疏數百上世宗每嘉納之稱爲言官一人嘗劾文選郎
黃正貪婪欺妄帝下正詔獄令十三道御史公舉冒進得罪者

二十餘人

明史本傳 浙江通志 徽州府志

潘絲字朝源婺源人浙東礦盜起掠婺入歙部使者强起絲大
破之超格薦授嚴州別駕權知分水縣縣喜訟絲條析縷解訟
漸稀丁多浮額民苦之鈎稽古贖去虛者千數三月而邑大治
移攝建德蠲歲徵八百有奇刊爲額

浙江通志

江文式字時憑婺源舉人知莘縣賊師尙詔攻掠城邑一日假校尉帶數十騎過莘文式偵知爲賊生擒之撫按上其功詔建

偉績坊

江南通志

畢效欽字平仲歙縣舉人官南昌府通判時閩廣巨寇張蠻流

逖鄱陽湖請兵戮之

徽州府志

鄭惟誠字伯明祁門人嘉靖辛丑進士授金華府推官擢給事

中出知長沙府聽訟明允校士精詳升陝西提學改廣東副使

與嚴嵩壻同官嘗樓飲嚴壻以酒迫之曰飲此立開府惟誠怒

推之下竟爲所中罷歸

湖南通志
徽州府志

汪垧字仲宏休甯人嘉靖甲辰進士授戶部主事轉員外郎時

修會典十三司皆垧總裁升福建兵備僉事分守福甯倭犯同

安垧釋重囚七人擊倭卻之捷聞擢參議

明史董漢儒傳

廣信知府楚酋叛於閩佯歸浙督府珍策其必叛勒兵戒嚴酋乃轉掠他郡遷浙江參政會游民據銅山破婺源且掠歙急請發兵要其歸路殪之因錮銅山官終貴州左布政

徽州府志

殷正茂字養直歙縣人嘉靖丁未進士由行人選兵科給事中歷廣西雲南湖廣兵備副使遷江西按察使古田獍韋銀豹黃朝猛反擢正茂右僉都御史巡撫廣西調兵討之遂斬朝猛捕銀豹磔諸京師遷提督兩廣軍務羣盜及倭爲害正茂議守巡官畫地分守而徙濒海謫戍之民於雲南川湖絕倭嚮導先後殺倭千餘以次削平諸盜累加兵部尙書兼右副都御史召爲南戶部尙書改北部疏請節用諫止採買珠寶引疾致仕

明史本傳

汪道昆字伯玉歙縣人嘉靖丁未進士知義烏縣歷福建兵備

副使有悍卒擁脅巡撫道昆馳入軍門戮其首事一軍寂然倭陷興化全閩大震道昆走浙請胡宗憲檄戚繼光往平之升按察使晉右僉都御史巡撫福建與繼光討平大盜吳平復撫鄖陽召爲兵部右侍郎轉左侍郎乞養歸道昆詩文比肩王李自攀龍歿與王世貞狎主齊盟稱南北兩司馬所著有太函集行於世

明史王世貞傳
徽州府志

程嗣功字汝懋歙縣人嘉靖丁未進士歷官浙江參議錦衣陸炳徒屬恣橫嚴治之升廣東右布政殷正茂征古田嗣功轉餉有功進南戶部侍郎

徽州府志

吳鎬字宗周績溪舉人知上猶縣捐俸置田以恤士之貧者強寇掠境斬其渠餘黨悉散升安州知州築隄防水散種助耕民

德之

江南舊
通志

方若坤字子靜祁門舉人知桂平縣胥吏奸者不得逞爲郡司

理所讒被劾桂人祠祀之

徽州府志

俞喬字子遷休甯舉人知大田縣縣新造興學育才與民更化有妨於地方者悉去之流賊薄城捍禦七晝夜出奇設伏敗走之卒於官民祠祀之

徽州府志

方宏靜字定之歙縣人嘉靖庚戌進士知東平州擢戶部員外郎出爲江西副使饒州礦盜起部勒將卒示以必剿遣人招諭散其黨累擢右副都御史巡撫浙江胡宗憲新得罪水戰餘艘俱廢疏請增備禦倭得無警中飛語歸起補郎陽遷南戶部右侍郎督糧儲歲饑月出倉粟給軍使無繹民閒米價爲平宏靜

沈厚篤實居官介然有守卒贈工部尙書

一統志

程金字德良歙縣人嘉靖癸丑進士授南工部主事義無所染

分司龍江關要人援權相勢撓關法金鑾其船工於市後出守
長沙改漢陽發楚藩外屬奸賊二十萬張居正起私第託市木
金令自採試士以食稻衣錦爲題遂投劾歸漢陽祀名宦

江南通志

方良曙字子賓歙縣人嘉靖癸丑進士授工部主事榷木荊州
關吏兼請算舟不許額旣足乃罷兩月告緡恤刑畿輔釋三冤
獄嘗倣長垣故事治河河不爲災升雲南布政使捐羨金以潯
昆明池慨民田又築晉甯州城晉應天府尹卒

江南通志

江一麟字仲文婺源人嘉靖癸丑進士知安吉州撫散礦賊擢
工部郎吳時來等以疏劾嚴嵩下獄一麟力救得免轉廣平知
府歲旱蝗徒步齋禱雨集蝗死擢監軍副使以討廣寇率俞大
猷等馘賊渠曾一本時倭寇海豐島賊陷電白皆次第削平擢
撫貴州苗酋葉楷負固爲患設奇搗其巢請建爲長甯縣晉都

御史兼戶部侍郎總督漕務卒賜祭葬江南通志

程廷策字汝揚休甯人嘉靖癸丑進士授戶部主事抗疏糾錦

衣陸炳侵冒邊餉進郎中壬戌分守都城申嚴約束出知辰州

持守清介以忤上官歸徽州府志

李叔和字介夫祁門人嘉靖癸丑進士由推官擢御史抗疏糾

邪出按遼東浙江風裁峻整以疏劾相臣擅權幾陷不測罷歸

徽州府志

程大賓字汝見歙縣人嘉靖丙辰進士授吏部主事時分南北

考察所殿最無不當擢廣西副使繕甲兵嚴巡緝境內肅然督

學滇南以母老歸徽州府志

吳文光字有明婺源舉人知應山縣錢糧令民自封投櫃景王

之國督檄旁午文光量為裁節境內晏然徽州府志

方用歙縣人嘉靖中知郴州加意學校以官邸易民塘引九曲

水入學宮建號舍置學田士蒙其澤

湖南通志

黃金休甯人嘉靖閒知松溪縣修城拓學復湛盧書院凡倉庾

橋梁廨署莫不葺治

福建通志

何其賢休甯人嘉靖中知甯遠縣清介自持議減差役究心水

利士民德之

湖南通志

李景歙縣人嘉靖中知沅州節費省刑愛民興學均州衛丁徭

請靖州幫貼衝疲之地百姓不受偏累西溪三壑甘味苗叛景

出奇計討平之請築便晃二堡

一統志湖南名宦

胡晟婺源人嘉靖中知沅陵縣樂藩督租率爲民害晟悉以法

繩之革辰沅夫役均民勞逸

一統志湖南名宦

汪如梅字汝會黟縣人嘉靖己未進士時錦衣陸炳方貴寵欲

以女妻不從人服其操官刑曹辨孕婦之死釋參將之冤出守

九江巨寇柯日迪聞而投服府城一面當水累被水蓄捐俸築

庾樓磯護之還河東陝西鹽運使

徽州府志

程道東字震伯歙縣人嘉靖己未進士授工部主事奉詔營景

王宮室還治河有功歷知保州復以治海擢戶部郎中出為雲

南知府

江南通志

凌琯字惟和歙縣人嘉靖壬戌進士授南安府推官追殺巢賊

擒其渠魁擢御史遇諸璫不少為禮都御史路楷以黨嚴嵩殺

沈鍊下獄柄臣欲釋其罪琯持不可直聲大振歷官陝西按察

使

江南通志

李寅賓字于陽婺源人嘉靖壬戌進士知嘉興縣升南工部署

漕儀真中貴人銜命採香泛巨艘索夫數百辱及寅賓寅賓奮

然登舟請以上採者役民餘當屏中貴人懼夜遁去築學斯堂

漕事之暇聚多士講學其中以忤時歸

徽州府志

余天爵字子修黟縣人由貢任廣信訓導三署縣事幹理有方

升知茂名縣辦軍餉戢獠蠻民樂輸將庭無留獄

江南舊志

楊旦字明甫休甯舉人知奉化縣築天甯長沙二隄民無水患

倭至設伏敗之邑立生祠焉通判杭州革織例金三千緡轉青

州疏河運三月成功

江南通志

許試字廷揚祁門舉人知將樂縣大治遷漳浦愛民好士廉潔

不徇干謁有古循良風

江南舊志

章淮字源豫績溪舉人授太平教諭嘗捐俸恤士之貧窶者升

長沙推官署善化瀏陽篆皆有惠政部使委查十三郡所至發

奸摘伏觸瘴死百姓哀之著全楚遺哀錄立祠祀焉

徽州府志

程文著字美中婺源人嘉靖壬戌進士知永嘉縣政務寬簡以蘇民困升袁州知府萍鄉令坐支帑俸免官不能自辨文著察令素廉索支俸劄驗之立白其誣因戍司藏者擢陝西苑馬寺卿

徽州府志

王京祥字用極祁門舉人知湘陰縣縣民逃賦曠京祥招復之裁夫役以當其賦單騎行村落課耕遇災荒賑恤如恐不及卒

於官櫬歸泣送者載道

湖南通志

張澍字子汝婺源舉人知石門縣清土官侵占之田復之編戶調魚臺地瘠兼苦河決部使者督開課工費甚亟他邑取辦民間澍獨檢庫藏得市稅千金舊例以充令公費者給之去之日兩涯泣送者數千人立祠以祀

徽州府志

汪萬和字一中黟縣舉人知桐鄉縣興學清賦招逋逃雪冤獄

有得釋者餽二千金毫無染指升膠州守

徽州府志

許國字維楨歙縣人嘉靖乙丑進士選庶吉士授檢討神宗爲太子出閣兼校書及卽位進右贊善充日講官歷位至文淵閣大學士太子太傅性木強數與言者爲難士論不附然廉慎自守累遭攻擊不能被以污名以疏請建儲爲帝所責乃乞休卒

贈太保諡文穆

明史本傳

游應乾字順之婺源人嘉靖乙丑進士授戶部主事改刑部歷郎中編次明律出守甯波浚陂塘通水利時郡邑承張居正指廢書院獨甯波存遷兩浙運使晉雲南按察平巨寇丁改有功轉廣東左右布政歲饑發廩且捐俸以賑歷位大理卿冤滯多所昭雪總督倉場先後條上四十餘事俱著爲令卒贈尚書

江甯志

通志

俞一貫字原心婺源人嘉靖乙丑進士知廬陵縣日吞王守仁遺政酌時宜而損益之邑民謠曰前伯安後新安稱二難以治行第一擢御史巡按山東上馬政疏決六郡聚訟之議引疾歸

徽州府志

許天膺字德夫黟縣人嘉靖乙丑進士知海甯縣奉檄丈田素精句股諸弊盡剔升戶部主事權北關以廉惠稱出守建甯疏古渠創建甯二衛遷兩浙長蘆鹽運使轉山東參政獄多平反卒之日遠近哀思之

浙江通志
江南通志

余一龍字汝化婺源人嘉靖乙丑進士知江山縣縣舊無城寇盜竊發一龍倡議城之俗負氣健鬪訓之以禮朔望聚講以敦倫睦族教諸生風俗丕變擢御史疏請東宮出學乞有諫臣鄭履純出補湖廣僉事治兵沔陽平桐柏湖寇建開築隄修四城

築三學累擢貴州副使殲叛苗歷四川左布政升南太僕卿謝

病歸

衢州府志
江南通志

汪文輝字德充婺源人嘉靖乙丑進士授工部主事改御史高拱以內閣掌吏部其門生多居言路日夜走其門專務搏擊文輝亦拱之門生心獨非之乃疏陳四事專責言官一曰傾陷二曰紛更三曰苛刻四曰求勝疏奏拱惡其刺己出爲甯夏僉事修屯政蠲浮糧建水牕流亡漸歸御史孫丕揚忤拱爲希旨者所劾方行勘文輝抗言曰毛舉細故齟齬正人不可爲也於是緩其事丕揚獲免拱罷政召爲尙寶卿尋告歸久之有詔召用未赴卒

明史
本傳

胡文光黟縣舉人知萬載縣革宿弊擒巨賊決兩省疑獄築城圻修學校起養濟院立水次倉升膠州知州兼理海運遷荆王

府長史乞養歸

徽州府志

江朝陽字儀卿婺源舉人知安鄉縣邑多水患築隄障之調孝

豐歲饑力爲請賑時當履畝之役丈量公平監司頒行其法升

上思州知州思始改土爲流庶事草創朝陽立倉庫修學宮畱

心教化習俗漸變升廣州府同知卒三地皆祀之

徽州府志

郭莊字子莊徽州人隆慶二年進士癸酉按蜀會多盜檄道府

剿治盜得息蜀府有所請於朝久沈閣莊爲請得允王鎮以金

卻之品望益重

四川通志
新增

汪階歙縣人隆慶初官武岡學正刻冠婚喪祭鄉射諸禮以訓

士督學使者校士至郡檄舉射禮雍容如制以教授致仕

湖南通志

余懋學字行之婺源人隆慶戊辰進士授撫州推官擢給事中

張居正進白燕白蓮頌抗疏言大臣不當獻瑞劾南守備太監

申信不法又疏陳五事與居正忤斥爲民起故官奏奪成國公
朱希忠王爵請召還岳相魏時亮十八人帝俱報可擢南尚寶
卿上臣工十蠹疏其所言好勝之弊必成朋黨後果如其言累
遷南戶部右侍郎總理漕儲卒贈工部尚書追諡恭穆

明史本傳

王璘原名之臣休甯人隆慶戊辰進士知鄞縣卻海船工費數
百金三年無海寇歷升戶部主事值地震上二疏甚稱帝意然
竟以疏內指斥權貴左遷後擢尚寶丞卒

徽州府志

黃金色字煉之祁門人隆慶戊辰進士知晉江縣改德興二邑
皆祀之升南戶部主事歷禮部郎中值大旱帝徒步郊禱上疏
以純心格天爲言又疏陳六事以忤貴近罷後起歷廣西參議

徽州府志

吳自新字伯恆祁門人隆慶戊辰進士歷杭州知府歲省織府

錢數千緡有重犯匿勦貴家執而戮之遷兵備副使歷左右布政歲祲設法以賑民不知饑杭人祀之巡撫河南晉南禮部侍

郎卒

徽州府志

胡用賓婺源人隆慶戊辰進士知樂清縣至誠愛民爲治以德內召民遮道攀留仕至太僕卿

溫州府志

程應元婺源舉人任溫州推官簡靜有威民自懾服署永嘉廉

潔益著遷臨江府同知

浙江通志

曹樓字世登歙縣人隆慶辛未進士授戶部主事督學四川會

松茂之役軍中卒從借筭遷江西右參政蜀人祀之名宦

江南書通

志